

Inatsisartut suleriaasianni § 36 naapertorlugu apeqquteqaat aallaavigalugu oqallisissiamik siunnersuut saqqummiuppara:

Maniitsumi RG-ip aalisakkanut suliffissuanut, saarullinnik uumatillugit uumatitsivissorlunilu tunissassiorup, nunatsinni annertusiartuinnartup, toqusooruteqartarnerullu piffinni assigiinngitsuni ajornartorsiutaasarnera peqassutsimut innarliinani, aningaasarsiutaanerali tamanut pitsaanerpaaffissamiitinneqarnissaat anguniarlugit, Naalackersuisut RG suleqatigalugu, nunatta ilaani immikkoortoortaqarfeqalersinnaanera pilersaarusoqatigiissinnaanerlu pillugit, apeqquteqaat aallaavigalugu oqallinnissamik siunnersuut.

(Inatsisartuni ilaasortaq Siverth K. Heilmann, Atassut)

Ukiorpasuaru aalisarneq aqutigalugu, aalisartut tunisassiorfiillu aningaasarsiornerisa naleqartitsinerulernissamik siunertaqarluni, partii Atassut tunuliaqutaralugu, inatsisartuni aqutigalugu anguniagaqartarneq aqutissiusseqataanerlu nutaarsiassaangillat.

Nunani allani aalisagaq qaqqinneqartoq tamaviat, aalisartunit tunisassiorfinniillu, ukiorpasuaru avammut niuernerminni aningaasarsiutigilluarneqartut, uagut aalisakkat piasuisuukkalluunniit aningaasarsiutigisassaraluagut avammut eqqaannartakkagut amerlaqaat, taamaattumik oqaluinnarani politikikkut tunisassiorfiillu piumassuseqalersinnissaannut aqutissiuunnissaat pisariaqarlunnarneranik Atassummiit oqariartuuteqartuarpugut.

Pinngortitap aqutsineratigut aalisagaqassuseq allanngorartuutuvoq. Aalisakkat illikartarput tammakartarlutilluunniit. Taamaattumik nuannaarutigisimaqaarput illoqarfitsinni aalisakkanik suliffissuaq isatiinnarneqartussaagaluaq inuillu 120-vit angerlartiinnarneqarnikuusut, kommuune-miit allanik suleqateqarluta, akisussaaffik tigusimasarput, massakkut RG_imit tigoqqinneqarluni piorsarneqarnikummat, kommuunemut nunatsinnut minnerunngitsumillu aalisartunut aningaasarsiornikkut iluaqutaalluarmat.

Saarullinnilli bundgarnersornermi uumatillugillu tunisassiorneq pitsaaquteqaraluaqaluni ernumanartoqarsinnaanera ataasianngeqalunga Naalackersuisuusartunut inatsisartunilu, aalisarnermi ataatsimiititaliami ilaasortanut, umiarsuaq pisanut assartuutaasartup ataasiinnaanera, avannamut Kangaatsiaq kujammullu Paamiut tikillugit bundgarn-inut ikiliartunngitsunut utaqqititsisarnerujussuaq ajornartorsiutaanera tikkuartortarpara.

Biolog-it aalisagaqassutsimut nalilersuisarnerat ilisimallugu, minnerunngitsumillu toqusoorutaasartut pillugit aalisapiluttutut aammalumi aalisartut namminneq toqusoortigineqartartunut isorinnittarnerat paasinarluinnartoq aammaarluta Maniitsumi aalisakkanut suliffissuatta assigiinngitsunik pissuteqartinneqarluni matunekaratarsinnaanera pinngitsoortinniarlugu pisussaaffeqarpugut tamatta pitsaaqqutinut ajoqutaasinnaasunillu aaqqiiniarnissatsinnut.

Siunnersuuteqartutut soorunami ilisimalluinnarpara, umiarsuaq aalisakkanik uumatillugillu tunisassiornermi assartuutaasoq taarserneqarnikuusoq, taannali aamma aallartisarnermi ajornartorsiuteqartarpoq. Pingaarnernunnginnerporli pisartut siunissamut ataavartumillu aalisarnikkut aningaasarsiornitta ataavartuarnissaanut siarsaajuarnissatsinnut nalilersueqatigiinnisarput. Taamaattumik oqallinnissamut pingaaruteqaqisumut, pisariaqartinneqarpallu oqallisissiap qulequtaa Naalakkersuisut peqquneqarnissaannik inatsisartuni ammaffigineqassappat siunnersuuteqartutuut itigartitsinavianngilanga.

Oqallilluarisi qujanarlu.